

## Mama ta menasa yiu menor cu e lo mat'e

**TIN** hopi di e tipo di casonan aki ta sosode na Aruba, sin embargo nan no ta bini den publicidad pa motibo cu ta trata di casonan hopi sensibil. E casonan aki ta haya atencion di e departamentonan concerni mayoria biaha via di denunciacion haci door di un familiar, docente of hasta e propio menor cu no por sigui biba den un situacion asina.

E caso aki ta uno cu mester a wordo manda Corte door di Voogdijraad y Fundacion Guia Mi pa brinda proteccion legal na e menor cu a bira victima di su propio mayornan cu tabatin'e pa añanan largo un situacion cu ningun mucha mester pasa aden.

Nan a bay Corte pa kita autoridad di e mama riba e mucha y pa pone den Centro Ortopedagogico, cual hopi biaha tampoco ta resulta di ta e miho solucion pasobra e muchanan cu pasa den problemanan asina mester di amor di famia. Lamentablemente tambe ta cu no ta haya famia cu ta saca un man pa yuda.

E caso aki ta di un mucha muhe di 14 pa 15 año, kende no a wordo reconoci door di su tata y for di su nacemento tabata bou cuido di e mama. Instancianan concerni ora cu haya nan mes cu un situacion asina ta

pidi Hues, mustrandó cu e menor tabata wordo abusa door di su protector of ta negligisha su criansa y cuido, pa kite for di e mama. Rapport di Voogdijraad a mustra cu e mucha muhe aki tabata wordo hopi descuida, e tabata wordo abusa emocionalmente door di su mama. Regularmente e mama tabata menasa e menor cu e lo mat'e. Y consecuencia di tur esaki tabata cu practicamente e no tabata bay scol. Mama y padrastro di e mucha ta uza droga, y e menor tabata testigo diferente biaha di violencia domestico. Tristo ta cu e mama mes no ta mira e daño cu e ta causando na su yiu, y e seriedad di e situacion. Mirando tur esaki Voogdijraad a conclui den su rapport cu e mama no por duna su yiu e tranquilidad, seguridad, estructura y proteccion necesario. Nan a pidi pa e wordo poni bou di Fundacion Guia Mi y interna den e centro ariba menciona.

Corte a ordena pa e bay bou guia di e fundacion menciona, pero pa loke ta e parti pa e wordo interna den e centro, Corte ta bisa cu e peticion aki no tin un base huridico pa cual el a wordo rechasa. Pero awor ta keda den man di e Fundacion como voogdes pa dicidi si ta na interes di e menor pa wordo interna den e centro.

Tin otro palabracion haci

## Ningun momento JZP a nenga di tuma denuncia di tata di e victima

**EN** conexcion cu un entrevista duna dor di e tata di e victima di abuso pa un empleado di Ibero American School, Cuerpo Policial ta aclarea cu nan ningun momento a nenga di tuma su denuncia.

Coleganan di Jeugd en Zeden Politie conhuntamente cu Ministerio Publico a palabra cu e victima y su mama cu ayera nan lo tuma nan declaracion/denuncia y ta locual coleganan di Jeugd en Zeden Politie a haci tambe. Kier men e tata ta un mentiroso tambe.

